

NO. SOALAN: 40

**PEMBERITAHUAN PERTANYAAN BAGI BUKAN JAWAB LISAN
DEWAN RAKYAT**

PERTANYAAN : BUKAN JAWAB LISAN

**DARIPADA : TUAN CHE MOHAMAD ZULKIFLY
BIN JUSOH [SETIU]**

RUJUKAN : 8803

SOALAN:

**Tuan Che Mohamad Zulkifly bin Jusoh [Setiu] minta MENTERI
DALAM NEGERI menyatakan langkah pemantauan dalam
mengekanj judi 'on-line' yang semakin berleluasa di negara ini.**

JAWAPAN:

Pihak PDRM, khasnya Jabatan Siasatan Jenayah sentiasa memberi perhatian yang khusus berkaitan aktiviti perjudian haram terutamanya yang melibatkan penggunaan internet dengan membuat pemantauan dan menjalankan operasi secara terancang dan berterusan di seluruh negara. Pihak polis telah melancarkan operasi khas pada Oktober 2014 di seluruh negara bagi membanteras kegiatan perjudian sehingga ke akar umbi sama ada yang dijalankan oleh orang-orang perseorangan dan juga sindiket-sindiket perjudian. Walaupun operasi membanteras aktiviti perjudian haram ini dijalankan secara besar-besaran dan berterusan namun aktiviti perjudian ini masih aktif kerana pengusaha pusat perjudian haram telah menukar *modus operandi* mereka dengan beroperasi disebalik perniagaan yang sah atas nama pusat hiburan keluarga (PHK) melalui lesen mesin *simulator* yang dikeluarkan sedangkan mesin-mesin tersebut telah diubahsuai untuk tujuan perjudian serta mengubah lokasi daripada premis perniagaan ke kondominium serta rumah kediaman bagi mengaburi mata pihak penguatkuasa.

Berdasarkan statistik daripada operasi yang dilaksanakan pada tahun 2015, sebanyak 9104 serbuan telah berjaya dilakukan. Hasil daripada serbuan, PDRM telah merampas sejumlah 96,593 unit komputer dan wang tunai RM 1,853,225.00 serta tangkapan seramai 19,727 orang. Di samping itu, dalam tempoh yang sama

sebanyak 5494 kes telah didakwa di bawah seksyen 4B Akta Rumah Judi Terbuka 1953 dan Enekmen Hiburan Negeri, manakala 2933 kes masih dalam siasatan dan 911 kes di NFA/KUS.

Sebagai langkah tambahan, selain daripada operasi yang dijalankan secara berterusan bagi mengekang kegiatan perjudian ini sehingga ke akar umbi, Kementerian melalui PDRM juga telah mengambil tindakan-tindakan seperti berikut:-

- i) Kementerian Dalam Negeri telah membentangkan Nota Makluman berhubung isu aktiviti perjudian haram pada Oktober 2014 dan pada Mac 2015 dalam Mesyuarat Menteri Besar dan Ketua Menteri Bil. 122 dan Bil 123 dengan menggariskan beberapa cadangan penyelesaian dan kaedah pelaksanaan penguatkuasaan terhadap aktiviti perjudian haram secara bersepadu melibatkan Pihak Berkuasa Tempatan (PBT), Polis Diraja Malaysia dan agensi-agensi kerajaan yang lain;**

- ii) Melatih lebih ramai pakar mengenai judi untuk memudahkan mereka mengenalpasti dan mengkategorikan sesuatu aktiviti itu mempunyai elemen perjudian. Disamping itu, ianya akan memudahkan proses mengemukakan keterangan bagi tujuan pendakwaan di Mahkamah; dan**

- iii) Meneruskan dan memperhebatkan lagi kempen-kempen dan ceramah-ceramah kesedaran tentang kesan aktiviti perjudian yang diadakan sebelum ini dengan menasarkankan golongan remaja di peringkat persekolahan. Program ini turut melibatkan pihak PBT, agensi-agensi Kerajaan yang berkaitan serta NGOs dan syarikat swasta;**

- iv) Bagi menentukan aktiviti perjudian ini dapat ditangani sepenuhnya daripada berulang kembali, PDRM telah menubuhkan unit pemantau yang diletakkan di bawah Jabatan Integriti dan Pematuhan Standard (JIPS) bagi memastikan gejala judi haram diperangi sehingga ke akar umbi. Pasukan ini akan memantau semula premis-premis yang pernah diserbu bagi memastikan premis berkenaan tidak kembali menjalankan semula aktiviti mesin perjudian haram;**

- v) PDRM telah mengkaji dan telah pun membuat beberapa cadangan pindaan terhadap Akta Rumah Judi Terbuka 1953 (Akta 289). Usaha untuk menggubal Akta ini telah dibincangkan dengan pihak PEMANDU pada bulan Ogos 2014. Pada Julai 2015, atas inisiatif pihak Peguam Negara, satu perbincangan telah diadakan dengan pengusaha judi berlesen dari seluruh negara, Bank**

Negara Malaysia, PDRM dan Kementerian Kewangan. Pihak PDRM telah mengenalpasti provisi-provisi yang perlu dipinda dalam menangani gejala perjudian secara dalam talian dengan lebih berkesan.

Pihak polis sememangnya berusaha keras untuk membasmi kegiatan perjudian ini sehingga dapat ditangani sepenuhnya. Namun demikian usaha dan tindakan yang diambil oleh polis melalui operasi "Op Dadu" yang dilakukan secara agresif dan berterusan tidak akan berjaya sepenuhnya tanpa penglibatan daripada orang ramai dalam menyalurkan maklumat kepada pihak polis. Disamping itu, orang ramai perlu menghindari aktiviti yang tidak sihat ini kerana aktiviti perjudian akan terus wujud jika ada permintaan daripada pemain.